

DIA INTERNACIONAL DI MUSEO

Tema: Museo y Hobennan

STA. CRUZ--- Dia Internacional di Museo ta ser celebra rond mundo for di aña 1977.

E fecha cu a ser escogi ta rond di 18 di Mei. Tur aña, ta dicidi un tema pa medio di e Comision di Consejo di “The International Council of Museums”, ICOM.

ICOM tin un definicion pa museonan cu ta “Un instituto di servicio pa sociedad y su desaroyo”.

Ta bon pa nos como comunidad refleha con importante nos museonan ta pa nos sociedad. Den spirito di e motto: Museonan ta di suma importancia pa intercambio cultural, nan ta aporta na e enriquecimiento cultural y ta desaroya

compresion mutuo di cooperacion y paz entre hende.

Tambe nan tin un rol hopi importante cu ta esun di educacion y conservacion di nos herencia cultural. Awor aki nos ta mira desaroyo y cu poco a poco nos museonan ta haya nan atencion di tanto local como turista. Tin un proyecto grandi den desaroyo cual ta esun di Museo Nacional Aruba. Esaki ta un muestra un biaha mas con importante nan ta den nos sociedad.

E aña aki e tema escogi ta “Museo y Hobennan”, esaki ta pa lanta e concientizacion con hoben ta participa den e re-definicion di e mision y practica di un instituto di



herencia den e siglo actual, tambe con museonan por contribui na duna forma na e sociedad di mañan door di interaccion cu e hoben.

E hoben ta forma e generacion nobo di profesionalnan y publico di museo pa e generacion nobo di museonan na caminda. Hobennan ta mas sensitivo na responsabilidad social, practica etico, na nos comunidad y ta fomenta dialogo intercultural y tolerancia.

Pesey nos kier encurasha e tur hoben y nan mayor pa bishita nos museonan mas hopi biaha. Duna aporte na e trabao cu ta ser realiza door di nos museonan.

Instituto di Cultura Aruba ta aplaudi tur loke ta ser realiza pa nos museonan dentro di nan medionan.

Tin museonan valioso operando den nos comunidad manera: Museo Arqueologico Aruba, Museo Historico Arubano, Museo

Numismatico Aruba, Museo di Antiguedad Aruba, Museo di Aloe, Museo di Deporte di Aruba y Museo Arubano di Modelo di Trein. Instituto di Cultura Aruba ta spera cu tur hoben, grandi y chikito lo bishita y sostene e museonan.

Instancianan manera: Archivo Nacional Aruba, Parke Nacional Arikok y Biblioteca Nacional Aruba tambe ta cay bao di e definicion di ICOM, pues tambe merece tur atencion riba e dia ariba menciona.

Nos ta hopi orguyoso di tin instancianan manera menciona. Tur ta duna aporte na nos cultura y herencia cultural den un sociedad den desaroyo, aportando cu e rol importante di educa y conserva tur loke ta di nos pueblo.

Riba un dia tan importante asina Instituto di Cultura Aruba ta felicita e instancianan y nos pueblo en general.